



*Sabtu, 28 November 2020*

**Ogen: Kuan-kuanen 24:5-6**



*Rencana si Megermet*



**B**iasana adi lit sura-sura mbangun rumah, isuruh lebe arsitek erbahan gambarna ras erbahan taksasi biayana. Guna erbahan gambar e Arsitek pe ngenehen ukuren taneh ras bentuk taneh si man bangunen e. Tupung ia erbahan gambar e, iperluken ije imajinasi, daya kreativitas, uga ibahanna bentuk bangunen e, arah ija pintuna, ija letak ruang-ruangna, piga meter halamen rumah ras sidebanna. Daya imajinasi e cukup penting, kenca sie ibahanna gambarna, bentuk rumah kenca pagi jadi, emaka iturikenna man si mada rumah. Ibahanna pe erga-erga bahan siniperluken, gelah enggo ieteh si mada rumah asakai biaya siniperluken guna mbangun rumah e. Kenca siuen bentuk rumah ras ergana emaka idarami tukang lako mbangun rumah e, janah i bas proses mbangunsa e tetap iawasi arsitek si nggambarsa ndai. Kalak si make imajinasina i bas ndahiken sada pendahin banci kataken kalak pentar, la terjeng gegehna ngenca i andalkenna tapi pe pemeteh, daya pikir ras kreativitasna. Kalak pentar ietehna pemetehna, daya berfikir ras kreativitasna e uluna bas Tuhan nari. Emaka Pemeteh e ituduhkenna arah perbahanen si bujur, adil dengen benar. Bujur ertina, erdalan rikutken aturen entah undang-undang. Janah aturen e erpalas ku bas kata Dibata eme erkeleng ate man manusia ras erkeleng ate man Dibata. Keleng ate e teridah arah perbahanen si adil ras benar. Adil biasana ipaken i bas muat keputusan si resmi, umpamana i bas pengadilen. La memihak, la semena-mena, mereken kesejahteran man kalak si deban. Benar biasana ipake ku bas prilaku (moral) si teptep wari; jujur, bersih lagu langkah, la nipu, la nokoh ras sidebanna. Jadi kalak pentaren eme iantusina Kata Dibata si ringan i bas pusuha, kata Dibata e ulu pemetehna, emaka ituduhkenna arah perbahanen kekelengen si teridah arah sikap bujur, adil ras benar. Ietehna mbedaken apai si payo guna dirina, apai si la payo si man tadingenken. Ay.6 renungenta ngataken maka kalak pentar tetap erbahan rencana si megermet. iukurina lebe kai si arus ibahanna, ipakena imajinasina, la buru-buru muat keputusan janah nggit megiken pedah ras pengajaren kalak si deban.